

Broj: 03-02-746/2024
Sarajevo, 30.04.2024. godine

**PARLAMENT FEDERACIJE
BOSNE I HERCEGOVINE**

- **Predstavnički dom -**
gđa. Mirjana Marinković - Lepić, predsjedavajuća
- **Dom naroda -**
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije BiH, a u vezi sa odredbama čl. 163, 164. i 165. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i čl. 155, 156. i 157. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), **radi razmatranja i prihvatanja, dostavljam Vam NACRT ZAKONA O ZAŠTITI PRAVA NA PRAVIČNO SUĐENJE U RAZUMNOM ROKU**, koji je utvrdila Vlada Federacije Bosne i Hercegovine na 33. sjednici, održanoj 30.04.2024. godine.

Nacrt zakona se dostavlja na službenim jezicima i pismima Federacije Bosne i Hercegovine

S poštovanjem,



Prilog u printanoj i elektronskoj formi (CD):

- Nacrt zakona na bosanskom jeziku,
- Izjava o usklađenosti,
- Obrazac 1a,
- Obrazac 2 i
- Obrazac IFP-DA

Co: Federalno ministarstvo pravde
gosp. Vedran Škobić, ministar

Co: predmet

**BOSNA I HERCEGOVINA
FEDERACIJA BOSNE I HERCEGOVINE
VLADA**

NACRT

ZAKON

O ZAŠTITI PRAVA NA PRAVIČNO SUĐENJE U RAZUMNOM ROKU

Sarajevo, april 2024. godine

ZAKON

O ZAŠTITI PRAVA NA PRAVIČNO SUĐENJE U RAZUMNOM ROKU

I. OSNOVNE ODREDBE

Član 1. (Predmet zakona)

Ovim zakonom propisuju se način, uslovi i postupak zaštite prava na pravično suđenje u razumnom roku u sudskim postupcima koji se vode pred nadležnim sudovima i tužilaštvima u postupcima istrage u Federaciji Bosne i Hercegovine.

Član 2. (Svrha zakona)

Svrha ovog zakona jeste da spriječi nastajanje povrede prava na pravično suđenje u razumnom roku, pruži sudsku zaštitu u slučaju povrede tog prava i pravično obeštećenje.

Član 3. (Rodna ravnopravnost i diskriminacija)

- (1) Pravo na zaštitu prava na pravično suđenje u razumnom roku pod uslovima propisanim ovim zakonom imaju sve osobe bez diskriminacije po bilo kom osnovu u skladu sa Zakonom o zabrani diskriminacije („Službeni glasnik BiH“, br. 59/09 i 66/16).
- (2) Izrazi koji su dati u jednom gramatičkom rodu u ovom zakonu, bez diskriminacije odnose se jednako na muški i ženski spol.

Član 4. (Imaoci prava na pravično suđenje u razumnom roku)

- (1) Stranka u sudskom postupku koja smatra da nadležni sud nije odlučio u razumnom roku o njenim građanskim pravima ili obavezi ili optužbi za krivično djelo, ima pravo na sudsku zaštitu shodno odredbama ovog zakona.
- (2) Stranka ima pravo zaštite prava na postupanje u razumnom roku i u postupcima istrage pred nadležnim tužilaštvom.

Član 5.

(Pravna sredstva kojima se štiti pravo na pravično suđenje u razumnom roku)

Pravna sredstva kojima se štiti pravo na pravično suđenje u razumnom roku su:

- a) zahtjev za ubrzanje postupka radi izbjegavanja povrede prava na pravično suđenje u razumnom roku,
- b) zahtjev za zaštitu prava na pravično suđenje u razumnom roku i pravično novčano obeštećenje za nematerijalnu štetu.

Član 6.

(Mjerila za ocjenu trajanja suđenja u razumnom roku)

Pri odlučivanju o pravnim sredstvima kojima se štiti pravo na pravično suđenje u razumnom roku garantirano članom II.3 e) Ustava Bosne i Hercegovine i članom 6. stav 1. Evropske konvencije za zaštitu ljudskih prava i osnovnih sloboda, uvažavajući standarde prava na pravično suđenje koje je utvrdio Evropski sud za ljudska prava i Ustavni sud Bosne i Hercegovine, uzimaju se u obzir:

- a) složenost predmeta u činjeničnom i pravnom smislu,
- b) aktivnost suda, tužilaštva i drugih organa,
- c) ponašanje podnosioca pravnog sredstva,
- d) značaj predmeta za podnosioca pravnog sredstva,
- e) zakonske odredbe o hitnosti postupka,
- f) ukupna dužina trajanja postupka.

Član 7.

(Hitnost u postupanju)

Postupci u kojima se štiti pravo na pravično suđenje u razumnom roku su hitni i imaju prvenstvo u odlučivanju.

II. ZAHTJEV ZA ZAŠTITU PRAVA NA PRAVIČNO SUĐENJE U RAZUMNOM ROKU

Član 8.

(Pokretanje postupka)

- (1) Postupak u kome se štiti pravo na pravično suđenje u razumnom roku počinje podnošenjem zahtjeva nadležnom sudu ili tužilaštvu pred kojim se vodi postupak iz člana 1. ovog zakona.
- (2) Zahtjev se može podnijeti dok se postupak iz člana 1. ovog zakona ne okonča.

Član 9.

(Sadržaj zahtjeva)

Zahtjev treba sadržavati:

- a) osobno ili poslovno ime stranke i njeno prebivalište, boravište ili sjedište,
- b) osobno ili poslovno ime zastupnika ili punomoćnika stranke i njegovo prebivalište, boravište ili sjedište,

- c) naziv suda pred kojim se vodi postupak ili naziv tužilaštva pred kojim se vodi istraga,
- d) poslovni broj sudskog ili tužilačkog predmeta,
- e) vrijeme trajanja sudskog postupka ili postupka pred tužilaštvom,
- f) podatke o predmetu suđenja ili istrage koji ukazuju na to da sud ili tužilaštvo nepotrebno kasni s odlučivanjem,
- g) obrazloženje zahtjeva kojim dokazuje da je povrijeđeno pravo na suđenje u razumnom roku,
- h) svojeručni potpis stranke ili zastupnika ili punomoćnika stranke.

Član 10. (Odlučivanje o zahtjevu)

- (1) O zahtjevu odlučuje predsjednik suda ili glavni tužilac.
- (2) Predsjednik suda ili glavni tužilac, godišnjim rasporedom poslova može odrediti jednog ili više sudija ili tužioca da pored njega vode postupak ili odlučuju o zahtjevu.
- (3) Usmena rasprava se ne održava.
- (4) Rješenje o zahtjevu ne smije da utiče na činjenična i pravna pitanja koja su predmet suđenja.
- (5) Rješenje kojim se usvaja ili odbija zahtjev mora biti obrazloženo.
- (6) Rješenje o zahtjevu mora se donijeti u roku od 30 dana od dana prijema zahtjeva.

Član 11. (Ispitni postupak)

- (1) Predsjednik suda ili glavni tužilac, u roku od osam dana od dana prijema zahtjeva, zatražiti će od sudije ili predsjednika vijeća (u daljem tekstu: sudija) ili tužioca koji postupa u predmetu, izvještaj o dužini trajanja postupka, razlozima zbog kojih postupak nije okončan i mišljenje o roku u kojem se predmet može riješiti, a može izvršiti i uvid u spis predmeta.
- (2) Sudija ili tužilac koji postupa u predmetu dužan je dostaviti izvještaj iz stava (1) ovog člana odmah ili najkasnije u roku od osam dana.

Član 12. (Odlučivanje o zahtjevu bez ispitnog postupka)

- (1) Zahtjev se odbacuje bez ispitnog postupka ako odsustvo nekog elementa zahtjeva iz člana 9. ovog zakona onemogućava da se po njemu postupa ili ako je zahtjev podnijela neovlaštena osoba. Protiv rješenja o odbacivanju zahtjeva nije dozvoljena žalba.
- (2) Zahtjev se odbija bez ispitnog postupka i ako je, s obzirom na trajanje postupka koje je navedeno u prigovoru, očigledno neosnovan.

Član 13.
(Odlučivanje o zahtjevu nakon ispitnog postupka)

- (1) Predsjednik suda ili glavni tužilac proučava izvještaj, a po potrebi i spise predmeta, primjenjujući mjerila za ocjenu trajanja suđenja u razumnom roku iz člana 6. ovog zakona i rješenjem zahtjev odbija ili usvaja.
- (2) Ako predsjednik suda ili glavni tužilac, utvrdi da je zahtjev iz člana 9. ovog zakona osnovan, rješenjem će odrediti rok da bez odlaganja, a najduže u roku od šest mjeseci od dana donošenja rješenja, sudija ili tužilac mora poduzeti konkretne mjere za rješavanje predmeta.
- (3) Rješenje iz stava (2) ovog člana predsjednik suda odnosno glavni tužilac, dostavlja stranci i postupajućem sudiji, odnosno tužiocu.
- (4) Protiv rješenja iz stava (2) ovog člana žalba nije dozvoljena.
- (5) Rješenje iz stava (2) ovog člana predsjednik suda dostavlja i Visokom sudskom i tužilačkom vijeću Bosne i Hercegovine radi evidencije.
- (6) Ukoliko postupajući sudija ili tužilac ne postupi po odredbi iz stava (2) ovog člana, predsjednik suda ili glavni tužilac dostavlja izvještaj Uredu disciplinskog tužitelja Visokog sudskog i tužilačkog vijeća Bosne i Hercegovine.

Član 14.
(Žalba)

- (1) Ako predsjednik suda ili glavni tužilac utvrdi da je zahtjev neosnovan, odbit će ga rješenjem protiv kojeg stranka ima pravo žalbe u roku od osam dana od dana prijema rješenja.
- (2) Stranka ima pravo na žalbu ako predsjednik suda ili glavni tužilac o njenom zahtjevu ne odluči u roku od 30 dana od dana prijema zahtjeva.

Član 15.
(Nadležnost za odlučivanje o žalbi)

- (1) Žalba iz člana 14. ovog zakona, se podnosi predsjedniku suda ili glavnom tužiocu, koji je odlučivao o zahtjevu.
- (2) Predsjednik suda odnosno glavni tužilac iz stava (1) ovog člana, žalbu sa relevantnim podacima iz spisa predmeta odmah dostavlja predsjedniku neposredno višeg suda ili glavnom federalnom tužiocu.
- (3) Ako je o zahtjevu odlučivao predsjednik Vrhovnog suda Federacije Bosne i Hercegovine, postupak po žalbi vodi i odlučuje vijeće Upravnog odjeljenja Vrhovnog suda Federacije Bosne i Hercegovine, sastavljeno od troje sudija.

- (4) Žalba se ne dostavlja na odgovor niti se održava usmena rasprava.
- (5) Predsjednik neposredno višeg suda iz stava (2) ovog člana i glavni federalni tužilac, odnosno vijeće iz stava (3) ovog člana, dužni su odlučiti o žalbi u roku od 30 dana od dana prijema žalbe.
- (6) Predsjednik neposredno višeg suda i glavni federalni tužilac, odnosno vijeće iz stava (3) ovog člana može žalbu odbiti kao neosnovanu i potvrditi prvostepeno rješenje ili preinačiti rješenje.

Član 16.
(Pravo na novi zahtjev)

- (1) Stranka čiji je zahtjev iz člana 9. ovog zakona, odbačen zbog neurednosti zahtjeva može podnijeti novi zahtjev.
- (2) Stranka čiji je zahtjev iz člana 9. ovog zakona odbijen a koja nije podnijela žalbu, može podnijeti novi zahtjev kada istekne šest mjeseci od dana prijema rješenja o odbijanju zahtjeva.
- (3) Stranka čija je žalba iz člana 14. stav (1) ovog zakona odbijena, može podnijeti novi zahtjev kada istekne šest mjeseci od dana prijema rješenja o odbijanju žalbe.

III. ZAHTJEV ZA ISPLATU PRIMJERENE NAKNADE ZBOG POVREDE PRAVA NA PRAVIČNO SUĐENJE U RAZUMNOM ROKU

Član 17.
(Sticanje prava)

- (1) Ako sud odnosno tužilaštvo ne riješi predmet u roku određenom u rješenju iz člana 13. ovog zakona, stranka može podnijeti zahtjev za isplatu primjerene naknade zbog povrede prava na pravično suđenje u razumnom roku, o čemu se donosi rješenje.
- (2) Zahtjev iz stava (1) ovog člana se podnosi predsjedniku suda ili glavnom tužiocu koji su odlučivali o zahtjevu iz člana 10. st. (1) i (2) ovog zakona, u daljem roku od šest mjeseci.
- (3) Rješenje iz stava (1) ovog člana, donosi se u roku od 30 dana od dana podnošenja zahtjeva.
- (4) Protiv rješenja iz stava (3) ovog člana, stranka može u roku od osam dana od dana prijema rješenja, podnijeti žalbu predsjedniku neposredno višeg suda odnosno glavnom federalnom tužiocu.
- (5) Ako je rješenje iz stava (2) ovog člana donio predsjednik Vrhovnog suda Federacije Bosne i Hercegovine, rješenje po žalbi donosi vijeće Upravnog odjeljenja Vrhovnog suda Federacije Bosne i Hercegovine sastavljeno od troje sudija.

- (6) Rješenje iz stava (1) ovog člana, dostavlja se stranci, predsjedniku suda ili glavnom tužiocu, pred kojim je došlo do povrede prava na pravično suđenje u razumnom roku te Visokom sudskom i tužilačkom vijeću Bosne i Hercegovine i nadležnom organu iz člana 19. ovog zakona.

Član 18.
(Visina novčanog obeštećenja)

- (1) Zbog povrede prava na pravično suđenje u razumnom roku, stranci u sudskom postupku, dosuđuje se novčano obeštećenje.
- (2) Novčano obeštećenje iz stava (1) ovog člana, određuje se u iznosu od 300,00 KM do 3.000,00 KM po predmetu.
- (3) Izuzetno od stava (2) ovog člana, u posebnim slučajevima kada je više osoba oštećeno u sudskom postupku u kojem je utvrđena povreda prava na pravično suđenje u razumnom roku, naknada štete može iznositi do 10.000,00 KM po predmetu.
- (4) Visina novčanog obeštećenja određuje se u skladu sa mjerilima koja su utvrđena u članu 6. ovog zakona.

Član 19.
(Isplata i osiguranje sredstava)

- (1) Novčano obeštećenje iz člana 18. ovog zakona, isplaćuje se iz budžeta Federacije Bosne i Hercegovine za povrede koje su učinjene pred Vrhovnim sudom Federacije Bosne i Hercegovine, odnosno iz budžeta kantona za povredu prava koje su učinjene pred općinskim ili kantonalnim sudom ili kantonalnim tužilaštvom, iz koga se finansira sud ili tužilaštvo.
- (2) Rješenje iz člana 17. stav (6) ovog zakona ima snagu izvršne isprave i dostavlja se nadležnoj vladi iz koje se finansiraju institucije iz stava (1) ovog člana.
- (3) Rok za isplatu po rješenju iz stava (2) ovog člana je šest mjeseci.

IV. PRELAZNE I ZAVRŠNE ODREDBE

Član 20.
(Primjena Zakona o vanparničnom postupku)

Na postupke iz ovog zakona, shodno se primjenjuju odredbe Zakona o vanparničnom postupku ("Službene novine Federacije BiH", br. 2/98, 39/04, 73/05 i 11/21), ako ovim zakonom nije drugačije određeno.

Član 21.
(Uređenje visine novčanog obeštećenja)

Visinu novčanog obeštećenja utvrđenu u člana 18. ovog zakona, kantoni u Federaciji Bosne i Hercegovine, mogu drugačije urediti zakonom kantona.

Član 22.
(Oslobađanje od plaćanja takse)

Stranke su oslobođene plaćanja sudske takse u postupcima koji se vode prema odredbama ovog zakona.

Član 23.
(Započeti postupci)

Stranka koja je podnijela apelaciju Ustavnom sudu Bosne i Hercegovine prije stupanja na snagu ovog zakona, ne može podnijeti zahtjev za zaštitu prava na pravično suđenje u razumnom roku po ovom zakonu.

Član 24.
(Završna odredba)

Ovaj zakon stupa na snagu osmog dana od dana objavljivanja u „Službenim novinama Federacije BiH“.

O B R A Z L O Ž E N J E

NACRTA ZAKONA O ZAŠTITI PRAVA NA PRAVIČNO SUĐENJE U RAZUMNOM ROKU

I - USTAVNI OSNOV

Ustavnopravni osnov za donošenje ovog zakona sadržan je u odredbama člana IV. A. 20. (1) d) Ustava Federacije Bosne i Hercegovine. Naime, prema odredbama člana IV. A. 20. (1) d) Ustava Federacije Bosne i Hercegovine, Parlament Federacije Bosne i Hercegovine nadležan je za donošenje zakona o vršenju funkcije federalne vlasti, iz čega proizilazi da navedena odredba predstavlja ustavnopravni osnov za njegovo donošenje.

II - RAZLOG ZA DONOŠENJE ZAKONA

U Bosni i Hercegovini pravni osnov kojim je utvrđeno i kojim se štiti pravo na suđenje u razumnom roku nalazi se u Ustavu Bosne i Hercegovine (u daljem tekstu: Ustav BiH). Prema članu II/2. Ustava BiH, „prava i slobode predviđeni u Evropskoj konvenciji za zaštitu ljudskih prava i sloboda i njenim protokolima se direktno primjenjuju u Bosni i Hercegovini i imaju prioritet nad svim zakonima“. U članu II/3. Ustav BiH sadrži Katalog prava i utvrđuje da „sva lica na teritoriji Bosne i Hercegovine uživaju ljudska prava i slobode iz prethodnog stava, što uključuje: e) Pravo na pravično saslušanje u građanskim i krivičnim stvarima i druga prava u vezi sa krivičnim postupkom“. Navedena direktna primjena Evropske konvencije uključuje i član 6. stav 1. Evropske konvencije koji u svojoj prvoj rečenici glasi: „Prilikom utvrđivanja njegovih građanskih prava i obaveza ili krivične optužbe protiv njega, svako ima pravo na pravičnu i javnu raspravu u razumnom roku pred nezavisnim i nepristrasnim sudom ustanovljenim zakonom.“

Nadalje, Ustavni sud je u Odluci broj: AP-575/07 koju je donio 30.01.2010. godine, zaključio „da u pravnom sistemu Bosne i Hercegovine pred redovnim sudovima nije osigurana zaštita u vezi sa nerazumnom dužinom postupka“, te da „dostavlja ovu odluku svim relevantnim vlastima na svim nivoima na teritoriji Bosne i Hercegovine radi preduzimanja odgovarajućih koraka u vezi sa zaštitom i osiguranjem efikasnog pravnog lijeka u pogledu nerazumne dužine postupka pred redovnim sudovima u nacionalnom sistemu Bosne i Hercegovine“. Međutim, problem je i dalje ostao neriješen. Ustavni sud je u Odluci broj: AP-303/16 koju je donio 16.03.2016. godine, istakao „da utvrđivanje kršenja ustavnog prava nameće javnoj vlasti obavezu ne samo da isplati navedenim licima iznose koji su im dosuđeni na ime pravičnog zadovoljenja već i da odabere odgovarajuće opće i/ili, ukoliko to odgovara, pojedinačne mjere koje će usvojiti u pravnom poretku radi okončanja kršenja koja je Ustavni sud utvrdio i radi otklanjanja posljedica koliko god je to moguće“.

Ustavni sud Bosne i Hercegovine je u više slučajeva utvrdio povredu prava na suđenje u razumnom roku te je naložio provođenje generalnih mjera kao što je uvođenje preventivnog pravnog lijeka koji se odnosi na dužinu postupka. U konkretnim

slučajevima utvrđena je i naknada štete podnosiocima apelacija koje su pale na teret odgovarajućeg kantonalnog odnosno budžeta Federacije Bosne i Hercegovine. Istovremeno ukazujemo da u ovakvim predmetima i Evropski sud za ljudska prava utvrđuje naknadu štete.

U tom smislu preduzete su aktivnosti u cilju definisanja odnosno uspostavljanja efikasnog pravnog lijeka u odnosu na pravo na pravično suđenje u razumnom roku kroz zakonodavni okvir definisan ovim Nacrtom zakona. Ovaj zakonski Nacrt predviđa jasan, efikasan i ekonomičan zakonodavni okvir kojim se osigurava mehanizam preventivnog pravnog lijeka.

III - USKLAĐENOST PROPISA S EVROPSKIM ZAKONODAVSTVOM

Prilikom izrade ovog zakona, Federalno ministarstvo pravde je imalo u vidu Uredbu o Uredu Vlade Federacije BiH za zakonodavstvo i usklađenost s propisima Evropske Unije („Službene novine Federacije BiH“, broj: 26/20) i Uredbu o postupku usklađivanja zakonodavstva Federacije BiH s pravnom stečevinom Evropske Unije („Službene novine Federacije BiH“, broj: 98/16) i u tom smislu je izvršilo analizu evropske pravne stečevine. Nakon detaljne i sveobuhvatne analize, zaključeno je da ne postoje primarni niti sekundarni izvori evropskog prava koji reguliraju predmetnu materiju. Također, donosi se novi zakonski okvir kojim se vrši implementacija odluka Ustavnog suda BiH. Imajući u vidu naprijed navedeno, obrađivač navedenog zakona nije u mogućnosti dostaviti tablicu usklađenosti.

IV - OBRAZLOŽENJE POJEDINIH ZAKONSKIH RJEŠENJA

Ovaj Nacrt zakona čine četiri poglavlja kojima se definiše postupak ostvarenja prava na pravično suđenje u razumnom roku pred sudovima u Federaciji Bosne i Hercegovine.

U I. poglavlju ovog Nacrta uređena su pitanja predmeta, svrhe zakona, rodne ravnopravnosti i diskriminacije, imaoca prava na pravično suđenje u razumnom roku kao i pravna sredstva kojima se štiti pravo na pravično suđenje u razumnom roku, mjerila za ocjenu trajanja suđenja u razumnom roku i hitnosti postupanja.

Od značajnijih odredaba izdvajamo da su pravna sredstva kojima se štiti pravo na suđenje u razumnom roku: zahtjev za ubrzanje postupka radi izbjegavanja povrede prava na pravično suđenje u razumnom roku kao i zahtjev za zaštitu prava na pravično suđenje u razumnom roku i pravično novčano obeštećenje za nematerijalnu štetu.

II. poglavlje ovog Nacrta sadrži odredbe kojima se propisuje pokretanje postupka, sadržaj zahtjeva, odlučivanje o zahtjevu, ispitni postupak, odlučivanje o zahtjevu bez ispitnog postupka, odlučivanje o zahtjevu nakon ispitnog postupka, žalba, nadležnost za odlučivanje o žalbi i pravo na novi zahtjev. Dakle, navedenim odredbama jasno se propisuje mehanizam zaštite prava na pravično suđenje u razumnom roku kroz podnošenje zahtjeva predsjedniku postupajućeg suda ili glavnom tužiocu.

III. poglavlje ovog Nacrta sadrži odredbe kojima se propisuje zahtjev za isplatu primjerene naknade zbog povrede prava na pravično suđenje u razumnom roku odnosno sticanje prava, visina novčanog obeštećenja, isplata i osiguranje sredstava.

Po navedenom zahtjevu odluku donosi predsjednik suda ili glavni tužilac, a na čije rješenje stranka ima pravo žalbe predsjedniku neposredno višeg suda, odnosno glavnom federalnom tužiocu, a ako je rješenje donio predsjednik Vrhovnog suda Federacije Bosne i Hercegovine, po žalbi odluku donosi vijeće Upravnog odjeljenja Vrhovnog suda Federacije Bosne i Hercegovine sastavljeno od troje sudija.

Prilikom odmjeravanja visine primjerene naknade, u osnovanim zahtjevima predsjednik suda ili glavni tužilac će se rukovoditi mjerilima propisanim članom 6. ovog zakonskog Nacrta.

IV. poglavlje sadrži prelazne i završne odredbe ovog zakonskog Nacrta. U navedenom poglavlju je predviđeno da se na postupke iz ovog zakona, shodno primjenjuju odredbe Zakona o vanparničnom postupku ("Službene novine Federacije BiH", br. 2/98, 39/04, 73/05 i 11/21), ako ovim zakonom nije drugačije određeno. Kantoni u Federaciji Bosne i Hercegovine mogu pitanja iz člana 18. ovog zakona, koja se odnose na visinu novčanog obeštećenja, drugačije urediti zakonom kantona. Ukoliko je stranka podnijela apelaciju Ustavnom sudu Bosne i Hercegovine prije stupanja na snagu ovog zakona, ne može podnijeti zahtjev za zaštitu prava na pravično suđenje u razumnom roku po ovom zakonu kao i da su stranke oslobođene plaćanja sudske takse u postupcima koji se vode prema odredbama ovog zakona.

V - FINANSIJSKA SREDSTVA

Ovaj zakon će imati implikacije na budžet Federacije Bosne i Hercegovine i kantona, obzirom na nadležni sud ili tužilaštvo pred kojim se utvrdi povreda prava na pravično suđenje u razumnom roku, imajući u vidu način finansiranja općinskih i kantonalnih sudova i tužilaštava koji se finansiraju iz kantonalnih budžeta, te Vrhovnog suda Federacije Bosne i Hercegovine koji se finansira iz budžeta Federacije Bosne i Hercegovine. U tom smislu, a imajući u vidu očekivani broj povreda prava na pravično suđenje u razumnom roku pred Vrhovnim sudom Federacije Bosne i Hercegovine, fiskalna procjena je urađena samo za budžet Federacije Bosne i Hercegovine.

Prema obavljenim konsultacijama sa Vrhovnim sudom Federacije Bosne i Hercegovine za implementaciju ovog zakona potrebno je osigurati 15.000,00 KM na godišnjem nivou.